

# CBETA電子佛典集成

---

CBETA Chinese Electronic Tripitaka Collection  
eBook


J39nB458

## 正覺潤光澤禪師澡 雪集

清 澤著 照水重編 陳聞道序  
有自狀（依駒本印）

財團  
法人

佛教電子佛典基金會



# 目次

- [編輯說明](#)
- [章節目次](#)
  - [序](#)
  - [目錄](#)
  - [七言古](#)
    - [和吳乾中侍御](#)
    - [寄陳麟圖茂生](#)
    - [小雪後五日送林我和尚歸興善有引](#)
    - [壽熊協臺](#)
  - [七言律](#)
    - [山居](#)
    - [七日壽方融和尚是日立秋](#)
    - [贈黎副使愧曾檀越](#)
    - [贈葉司理](#)
    - [紅山口訪徹光大士](#)
    - [寄秋山大士](#)
    - [和省之大士遊賀蘭韻](#)
    - [寄陳二猷居士](#)
  - [五言律](#)
    - [山居](#)
    - [正覺臺](#)
    - [清明](#)
  - [七言絕](#)
    - [游賀蘭山](#)
    - [再過蘊空山房](#)
    - [觀瀑](#)
    - [偶題](#)
    - [贈淡漢大師](#)
    - [吟雪](#)
    - [馬提督柘歸](#)
  - [口鼓子歌](#)
  - [示語](#)
    - [仲春雨雪示寂果九十春句](#)
    - [示寂擔](#)

- [示徒](#)
- [書問](#)
  - [贈黎副使魏曾](#)
  - [與葉司理](#)
  - [與提督陳檀越](#)
  - [與棗園眾文學](#)
  - [為保文學聖吾](#)
  - [寄省之大師](#)
- [雜著](#)
  - [亂談](#)
  - [十月朔十日口占續亂談示眾](#)
- [廣東和尚泡影集序](#)
- [自狀](#)
- [卷目次](#)
  - 1.
- [贊助資訊](#)

## 編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 [service@cbeta.org](mailto:service@cbeta.org) 回報。
- 版權所有，歡迎自由流通，但禁止營利使用。

## 正覺潤光澤禪師澡雪集序

粵形諸言句謂之文字禪鑿去言句謂之祖師禪總然鏤塵雕雪得無眼中金屬耳從上千七百則諸方正襟而談言句乎文字乎 潤翁大師究竟窮極不存軌則於是向日用酬答中或行吟澤畔或臥病床頭不覺成帙甲子秋抄余歸自洞庭聞師遷化人琴之感涕泗滂沱適上人春臺詣余袖出冊曰此先師澡雪集也欲謀剞劂知公與先師最善乞一言以弁諸冊余曰諸方用陞堂入室為傳心大師以詩歌尺牘作佛事耶閱之語語風來層層空到文冶丹融詞珠露合古今雅俗泚筆皆佳沛公殆天授非人力乎至於綽虹布橋食肉帶刺冷哨打世邊鼓撾人不疼不癢處真有涕腐墳之海淚斬猿圈之利鋒若夫向夕陽古道乞一文錢于衰柳寒蟬修五供養木土望丹一期心血水月鏡花半世行履此亦苾芻之急務也余填箴此集若有獲心者得澡雪則作者傳者亦勝禮懺三年矣爰命受梨以傳不朽但能了然一句勿誇念佛千聲世人眼開大師眉舞。

康熙乙丑仲春上澣之吉髮弟陳聞道沐手敬題

## 正覺潤光澤禪師澡雪集目錄

- 序
- 七言古
- 七言律
  - 山居
- 五言律
  - 山居
- 七言絕
- 口鼓子歌
- 示徒
- 書問
- 雜著
- 廣東和尚泡影集序
- 自狀
- 辭世偈

康熙庚辰冬日板存浙江嘉興府楞嚴寺大藏經坊  
正覺潤光澤禪師澡雪集卷一

香巖照水重編

## 七言古

### 和吳乾中侍御

小春霰拂松千樹語澀鶯聲聲數數寒巖凍谷忽生輝墨瀋淋漓蘇涸鮒  
支離未及一百年山林城市悲岐路惠我來年一晤之卜期九十春光暮  
明朝今日卻成新今日明朝又是故故故新新盡白頭逝者如斯寐不寤  
人世堪憐聚晤希辟之電火與漚露睦州擔板老婆禪親見海田曾幾度  
頻搔短髮卻憐人笑破衰顏偶寄句誰家瓶盂種芝蘭儂自林泉侶豕驚  
贅哉五可孝標哥一諾千金誰季布老年詩興學新腔生熟青黃污白素  
滑稽春秋貨殖篇莊子只堪郭象註五湖水闊憶池魚三窟草深矜狡兔  
富春灘上嚴子陵千載風高禡知遇詎云貧賤亦驕人世外浮雲何所慕  
古今成敗車馬塵飛作遊人眼中霧出處兄弟各存亡涕泣無從成笑具  
風流猶念赤城霞公案漫翻白馬渡鏡花水月事有無郵亭往來渾客寓  
自來倔強慣窮途薄劣敢道儒冠誤百歲無多義則長知音曾把黃金鑄  
乳花雪似滴春香寄我髫年老師傅挑開笑臉待阮劉漁郎谷口橫舟住  
赫連雙塔一品題荊棘銅駝元昊墓豈不道蜀道難於上青天疲馬先之  
勝學步

### 寄陳麟圖茂生

足狂突發登高興筇涉危巖攀石磴劈破虛空囊白雲分來一片與君贈  
白雲嚼碎漫吟哦中有章臺十二歌行行寫出相思句萬語千言不是多  
多君冷潔清於雪渴仰中懷徒哽咽諾重驪龍頷下珠啼輕杜宇口中血  
口中血濺有誰憐捶胸頓足哭蒼天含元殿在長安內文君誤上子陵船  
子陵水面平如鏡唧唧文君嗟薄命忘卻夜來琴裏心教奴若個工懽敬  
懽敬徒工都是錯曠野相逢且廣漠咄咄驢年孟八郎雞鵝隊裏覓鵬鶚  
一飛九萬秋風遲擘海吞龍未是奇怪他燕雀處堂裏大火聚時總不知  
知不知兮不可說北邙英傑眠金穴躑躅一任牧樵來誰向黃泉吊明哲  
金鑄子期事已殘孟門蜀道未為難人情反覆為雲雨白首相知劍氣寒  
金剛寶劍吹毛利擊碎虛空特小試我王庫中無此刀如蟲食木偶成字  
忉忉怛怛作麼生平到無緣自絕鳴鬼語聽殘恬不怪人情見慣渾無驚  
中流砥柱我無力子曰人之生也直請自思惟當內惺眼睜睜的不相識  
兄弟父子亦皆然曾誦閱牆三百篇天性同條常各爨兒孫賣盡四郊田  
翟公從未事輕傲朱履紛紛情深到倏忽門前見雀羅死生貴賤一相告  
帶礪山河閃電光見聞事不屬荒唐有言寺係汾陽宅故國園林樹樹霜  
功名銅柱麒麟閣風雨瀟瀟空落寞有欲與之談真詮九原可惜人難作  
季倫當日忒招搖金谷繁花絕代標更羨一端豪俠甚珍珠六斛買阿嬌



千秋誰得復誰失人世百年且未必莫學五陵輕薄兒能有長繩繫白日  
暫愈於今見小康病時方揀二陳湯後來再犯且姑置不信奄奄又健忘  
忘卻去來這一著無繩自縛紅絨索萬劫千生只此迴隋珠輕易彈黃雀  
黃雀高飛珠亦無沉河落海苦支吾一言倘得我君寤知罪從他作者乎  
者乎還我白雲來此物清寒絕巘隈磨盡古今渾不住癡人擬作籠中栽  
君不見貴妃囚的馬嵬山韓信恁麼未央間晨星暮日與春雪

### 小雪後五日送林我和尚歸興善有引

某懇懇苦留已弗能挽離弦之弩惜囊無金贐偶得蟲木數字呵筆玄沙  
之紙或於旅邸火爐頭少破笑顏卻不是別筵離套也。

赫寶塔上光纔曙悅服雲奔士女庶賀蘭山色沐風流詎道振衣賦歸去  
朔風趁冷雪初狂有客閒歌岐路羊潭北湘南在比屋寒巖不憚走斜陽  
斜陽踏破黃金隄靄靄嵐凋峰正禿彈指長安春到來終南一樣饒嫩綠  
溪岫雖殊雲月同歲寒松老耐霜風江河日下水流去成家何事建別峰  
別峰奇特慣閒事抹殺蒼公無畫字擒虎甚易行路難我憶古人善遊戲  
不是輕顛楊柳花隨風飄泊野情奢山光弗用多錢買好擇佳鄰陶姓家  
雖云懊惱猶多興惜我賀蘭還抱病乳花雪似洩春芬一曲巴歌希笑政  
函開自是笑詼詼唐突模糊何事哉破沙盆子少有力願效馳驅歸去來  
歸去來歸去來放下老胡那隻鞋

### 壽熊協臺

月映元宵舊臘雪一片清光真皎潔新春剛剛十日來正值將軍初度節  
將軍世家起三楚禪參姑熟瞋睡虎君子千里道同風邂逅神交足千古  
千古風流在一時玉蘊荊山價大奇庭前柏樹參天碧分惠三門豎兩枝  
枝掛慧燈光照遠點出蒼龍一對眼昏衢長夜旦如如百世千秋非淺顯  
若個足矣壽君家日前曾開火樹花珊瑚枝枝撐著月赤龍騎電戲煙霞  
煙霞便宜林泉客渾忘離亂年和月溪山雖別雲月同世間廣博休嫌窄  
鰲奴白牯卻知有八稜磨盤雲裡走把將寶劍揮虛空切忌傷鋒與犯手  
流水高山行路難冤家一會六月寒半句了了超百億好參父母未生前  
邇來寒峭燒楮拙訛言蝟集謠熒惑樹稼霜凝大有年事非怪異胡咄咄  
甲子千千億小年剎那海水變桑田世態人情如見慣何妨遊戲老婆禪  
禪道可笑亦可涕接響承虛都學句如印印水水成漪黃面何曾說一字  
字字葛藤何事焉逢人捨我一文錢單刀直入空王殿攜手重歌壽量篇

### 七言律

## 山居

聊遮風雨竹籬牆雲外橋斜橫石梁芍藥花紅開易落幽蘭色老久猶香  
興來有句書殘壁客去無情折嫩楊一種老僧忙不徹採來荷葉補衣裳  
苔花雨細色多斑為愛清芬就石刪轉度西峰雲簇簇歸尋東嶺月彎彎  
佳遊獨唱文殊頂勝蹟兩存牛首山足供幽人傭僻致鹿豕機化碧溪間  
如簀鳥語弄疏簷寂寂聲消逾靜恬閑把竹和蟻子醬慵將盤擇水晶鹽  
鋤雲石逕常披雨愛月柴扉不掛簾散步幾迴將懶發呼童柏子向爐添  
一雨紫芝破石生攜籃扶杖拂煙行奇花色媚如含笑好鳥聲嬌似遠迎  
卻識山中無俗客不知世上有閒名希夷怪抵經年睡為道先生不近情  
煙淡峰孤分外嶠明朝猶未卜陰晴林凋古木寒鴉集石響空山老鹿行  
變易滄桑隨物態高低冷暖任人情老僧功課隨時足寂寂紅塵遠市城  
夢對痴人說一場羊亡岐路忒奔忙世家百代名王謝帝統千秋誦漢唐  
金谷寒煙迷伊闕阿房荒草刈咸陽傷今悼古還古覺後方知夜夢良  
炊作煙霞煮藿藜菜根嚼斷抑何為每經按劍訝多異弗貴連城棄小玳  
攜我涼風歸北陸任他彩鳳出西岐無情鹿過草菴後啣去雲中五色芝  
陰雨重重見曉晴誰將姓字著閒名雞聲空杳仙人宅麥秀風搖帝子城  
碎石連雲將柏煮龍牙和月取泉烹歸來婚嫁無家累千古知時說向平  
溪煙清冷絕纖塵茅屋連松結勝因路僻猶多採藥客雲深也有弄風人  
波濤返覆人情險變易滄桑世故新收拾山光歸鉢底道人出處總無垠  
莫教萬壑眼迷麻富貴何曾更學奢打碎水晶炊白玉砌殘丹石踐紅霞  
就中重結摩羅果劫外新開優鉢花坐斷雲根猶未妙不知誰是主人家

## 七日壽方融和尚是日立秋

甲子千千億小年甚麼桃熟歲三千秋從此日胡涼矣巧到今宵曷乞焉  
詣造劫前終有漏法空合下總無緣病予五十三年客一起聊歌壽量篇

## 贈黎副使愧曾檀越

好將赤日繫長繩風雨初晴感廢興喝下渾忘驕貴客坐中弗計妒賢僧  
石林選勝應難際野寺尋涼豈易登千古一時有話在塵氛拂袖且誰能

## 贈葉司理

秋來幾日見新涼俚句慚惶報大方驢背鞍頭飛蛺蝶羊羔盞內臥螳螂  
門前朱履情深淺世外白頭念短長欲把禪宗闡一字恐依義路笑僧狂



### 紅山口訪微光大士

入雲攀磴踏山巔茅屋斜連怪石邊古灶香炊千歲柏瀑流吼落一溪天  
等閒漫道隨緣好底事堪參枯木禪惜墨如金方鄭重浪將俚句逐波漣

### 寄秋山大士

行雲不住怪他忙麝弗因風亦自香梁上無蛇疑影病鏡中有客怖頭狂  
人知雲月溪山別誰道薰風殿閣涼大意現成如薦得至今剎說舌元長

### 和省之大士遊賀蘭韻

俯仰古今笑捧腹奴兒諸子百家僕花光燦爛慵開門春色濃淡猶閉目  
一樹櫻桃抹瘦紅幾溪荷葉妝肥綠孤峰頂上唾纔噴錯落璣珠擬萬斛

### 寄陳二猷居士

長安市上問神洲踏破草鞋事浪遊不是仲宣憐去國何方宋玉迴多愁  
埋牛日午猶擔雪救火山尖尚覓流怪道魚藏波底宿碧空新月亦驚鉤

### 五言律

#### 山居

始快多年興思狂浪作銘石渠清抱碧松嶺雪函青遠塔標霄漢鮮雲濕  
畫屏憑君休妄計聞說北山靈

其二

碧嶂有佳致冷雲閒不飛巔危峰欲墮崖險水如推苔裏埋文碣霞中見  
石扉山靈多護惜不令老僧歸

其三

秋暮山光淡千峰翠色移寒泉甘石乳茶灶馥松脂稻熟雞都壯雲深鶴  
漸羸古今殊勝事獨為衲僧私

其四

旋風無有數破屋不成問於此日復日自然閒又閒幽禽穿亂竹冷月伴  
空山老我惟高枕何人為扣關

其五

悠悠又一年眼看春已暮千秋底事何恁麼成虛度今日事如新明晨即  
為故故故復新新穿破娘生褲

### 正覺臺

精舍連官路風塵到此休樹中無縫塔雲裏幾層樓惆悵臨河口徘徊覓  
渡頭迷途人可惜事事向他求

### 清明

清明方此日細雨滌花塵遠岫山光媚平原草色新鞦韆喧粉黛荊棘隱  
麒麟野哭聞郊外悠悠常睡人

### 七言絕

#### 遊賀蘭山

一路草香都是藥千林樹老盡生苔浮雲似水流將去怪石如人立起來

#### 再過蘊空山房

削就懸崖如翼開唯餘一徑滑蒼苔老僧欲住秋雲冷踏破西風卻又來

### 觀瀑

橫披白練到於今又說空栽玉樹林滿地珍珠無人拾入地誰知百尺深

### 偶題

賀蘭山上籠雲癡曾澡千年老雪池舉似諸人渾大笑自搔白首一書之

#### 贈淡漢大師

多病強歌幾度哀誰家玉管帶春回曲終嫋嫋聲猶在窗外梅花逐月來

### 吟雪

誰撒珍珠萬億斛溝壑平盈千峰禿叢林變作白珊瑚老僧暴富臥銀屋

#### 馬提督柩歸

人世存亡能幾何旌旗南往素車過棺中將帥余曾會不讓當年老伏波

### 口鼓子歌(述以志感聊為末後警訓云)

潤光自來不知禪潤光自來不會教隨緣放曠病逍遙心地法門戒熱鬧  
糠粃簸去亦云佳生也死也總不道馬祖踏殺天下人百丈投機解哭笑  
實實公案最現成妄生卜度與計較若有實法繫綴人尸佛留心皆不妙  
直教人悟不教疑墮在野狐何而貌十二時中作麼生晝喫粥飯夜睡覺  
任他蝗蟲蝦蟆禪僅去亂飛於亂跳幻化之中罪福空天堂地獄由人造  
妄言狂語當甚麼泥犁拔舌終須到名相不除眼中塵執著聖名於凡號  
參禪人莫亂叫南山大蟲戴紙帽驢前馬後總不知記個三玄共三要杜  
撰雷同總〔(序-予+林)/目〕謎迦葉門前剎竿倒錯知解尿尿窖一著  
輸了腦後砲因果分明勿強為戒之題目首云孝又云父母非我親又云  
諸佛非我導踏破草鞋作麼生南北東西徒浩浩行藏虛實自<sub>己</sub>知明明  
兩字偏酷好法尚應捨會也麼三心不得真玄奧非玄奧誰不屙屎誰不  
溺一喝誰當三日蟬好參古人墮破灶末法時代要至誠格物格天真克  
肖蒼蠅善盜逐臭腥老鼠善偷能穿鑿高亭隔江見德山招手橫趨越時  
套臨濟三度受棒時打出頂門眼一竅佛法無多驀地驚是恩是冤一時  
報汾陽冷淡絕攀緣葉縣孤高疑執拗古人方便為垂慈灸瘡疤上不著  
爇釋迦老子忒無緣事為不平刀出鞘麻木不仁問醫王不知痛癢難治  
療可憐蟬聲掠虛人捧著豬頭不識廟高著眼睛看新羅飛過衝天一俊  
鷄陽春白雪和應難唱來總是巴人調魚目冶鉅混金珠熨斗不是煎茶  
銚藥中也有寄生奴別家樹上生一蔦小兒滿地捉柳花任公海上將鰲  
釣香餌卻是無意男不管肥瘦與老少夢對痴人說一場不搔痒處搔靴  
勒休胡為莫輕躁米不細熟元粗糙良田不鋤草便生五穀佳種焉得茂  
看事為甚不分明眼中畢竟有倒眊積功累德希普賢不哭孩兒人會抱  
善星比丘卻問誰落下懊惱休傷悼換手搥胸哭蒼天驢年瞥地知好樂  
以膠投漆奈爾何垂涕而泣為正告好個奴見婢慙慙木叉喫緊貪妄盜  
獅子哮吼兒威寧韓盧逐塊口料掉多見犬吠與驢鳴紛紛鴉鳴共鵲噪  
駝尾上吊東瓜按著牛頭喫草料若不揮劍禪似麻一刀兩斷黃幡纛  
莫教鼻孔謾遼天按下雲頭須履蹈四大幻出無常身生滅不停水上泡  
東村有個醜老婆皺眉也把顰來效自<sub>己</sub>面貌醜與妍請往明鏡臺前照  
燕石等閒似羊脂赤藜不雜蒿草藿什麼禪什麼教心地法門戒熱鬧

### 仲春雨雪示寂果九十春句

春風白雪和陽春春半春分春未春去春來春不住因春不住法常新

## 示寂擔

出家一樣出家修道各自修道省發公案現成莫說不打緊要解脫枷鎖  
千條遠離塵緣憤鬧途中受用無窮今日纔會哭笑阿兄元是親哥打餅  
定要麵造

## 示徒

聖道式微禪宗末法江河日下之勢日月遲暮之辰僭妄和尚以不息奢侈  
互勝而驕矜人心日增世運漸減所以災異頻興兵荒不息正天心之慈愛  
令改往以修來若人情以吉祥定反邪而歸正體聖賢言尊佛祖教畢竟實  
學真參不作兩眼瞎漢果能考詳返約免得雙耳聾人以鳥為鳥久假而不知  
歸將刀作刁鳥知其為非有要參真正知識莫選矮子將軍學語學言繫  
金繩之鸚鵡作腔作態換頭面之梨園望道而未之見聖賢之心虛空有盡  
無窮如來之願得少為足二乘為菩薩所訶自以為是鄉愿為大賢所斥濃  
妝石青以畫月快磨鉛刀以鏤冰自用自專者為當時之愚賤謙卑忠恕者  
作畢世之嘉貞遠嵐淡靄不借春風而榮老柏蒼松不因歲寒而落此則專  
望於小子幸而無負乎老僧井中元自有天矇人亦嘗說象若索隱恐墮齊  
諧笈內太平常坐在無事甲中深人會之以搔首淺人得之以解頤祈天風  
調雨順祝君國泰民安克勤克儉全始全終切忌把髻投衙勿得思凡落草  
但盡凡心別無聖解建立畢竟掃除掃除方成建立者也。

又

毘藍方晨惜我風前剪燭太陽正午笑儂日裡挑燈窮措大彈指千生老頭  
巾回心一日獅子之兒必善哮吼天馬之駒自能[跳-兆+孛]跳嗟嗟七十  
歲一場懨懨念念二三子十分精進孤峰頂上切忌弄月吟風十字街頭遮  
莫出身露面嘆世故人情驕征化民末也悲禪宗佛法裨販色莊者乎名利  
不到心中一心名利是非不來口上滿口是非未見重生白骨曾聞再醮紅  
顏河伯亦足興波不必海若紅土堪能染紫何用朱砂木杓筌籥或者僅有  
井繩錢貫未必全無山人詩汗牛充棟大師錄塞壑填溝苦我割股救饑痛  
爾鳩酒止渴撒土揚沙把屎放尿熟讀楞嚴一部真參般若三心好夢只做  
一遭美酒勿思千日徹底掀翻微塵也要擊碎從頭又起萬行定要莊嚴無  
錢當枉罰道理畢竟作麼遍地總黃金玄奇元來如是行路之難不在山水  
成佛之易放下屠刀龍頭蛇尾善因而招惡果有始無終福地以致半途古  
鏡若明磚頭鑒我面目寶珠既得弊囊早已遺亡休圖門庭熱鬧隨緣淡飯  
粗衣但願堂構清涼本分遲眠早起瀛海海底慣騎追風之馬須彌山頂能  
泛逐電之舟龜毛繩穿鐵牛鼻孔冷灰豆換石女眼睛雖然恁麼說話恐汝  
不能踐言劍贈易水之俠客詩和青蓮之作家任他居士輕賤莫令宰官卑  
污烈風暴雨古廟藏身可避晨星暮日頑空著眼看他喚聲俗僧堪笑罵個

禿賊可悲千劫難得人身一朝既入僧侶白拂紅衣萬萬不可將就兩點一畫三三慎勿糊塗五位皆非實法三玄總是假名都盧在機先言外大抵向馬後驢前咄哉截斷葛藤允矣重添絡索勉爾兒孫尚乃祖父。

## 書問

### 贈黎副使媿曾

老檀越海內大方其詩其文早名天下我正覺勒碑刊木又名萬古矣幸逢嘉會兩沐風流承問百丈捲席因緣老僧下得一喝不知唐突多少耳根曾震動也未喝下曾解會也未至今渾無消息有消息無消息且置即以名天下大筆頭賜一轉語來為我荒臺輝天鑑地不令裴丞相白侍郎專美大唐國內也幸勿謂和尚家說沒正經話行沒要緊事雖然暫奉臘月扇子聊博清暇一笑兼付塔亭誌一紙更冀增玉減磚經指點頑鐵不難成金足霑老檀越翰墨佛事為林下人增一勝概令他年傳為佳話也臨啟不勝惶恐。

### 與葉司理

人生聚散如赫日昇沉只旦暮焉有何睽隔即某老病愚腐何緣沐浴春風雖三生慶幸實為世外知遇其所賜碑翰對聯已刻石刊木於亭於柱至今奕奕乎輝天鑑地也一時佳話護垂千秋雖某與老檀越溪山各別而雲月則同一仰瞻如親其溫和清涼之德色矣某既七十多年倘不即填溝壑俟光明之霽中天猶有待也不盡。

### 與提督陳檀越

邊氛招搖猶單刀入正覺一晤三十年風塵睽隔物色老僧全無半點驕貴氣像此定見破山老人以後風度平固小疵幃幄自有勝算只大將軍馬一身汗耳老僧某若不填溝壑俟凱旋煮茗燒沉水重話功成封侯之佳績實某禱之朝夕也。

### 與棗園眾文學

某感淪病骨愧溢孤魂雖無悔而終見其銷即招之而難從其返且長途弗責以老馬密林有憩於窮猿素餐空門寧亡羞惡忌言長者實恃哀矜將謂藥採桃源卜從此日詎意道逢荊棘遇匪其時支離之病雖深愷悌之腴方切雞肋已棄而猶惜覺頸欲續而徒悲前三十年穿針趁電後七八載擔雪埋牛問芻狗於造物小兒不延屢空之壽看滄桑於人情世故何妨非道之



窮一衲頭安往而不貧賤隻草鞋何處而非水雲長往滾鐘殊屬輕車熟路暫寄正覺又值窄路冤家彼既懇留某亦將就儒云行素釋曰隨緣幾年嗟蜀道之難一旦識長安之近日官路來來往往類市井攘攘熙熙白浪紅塵袪寒暑雨吃金牛飯或免束腹饑虛飲趙州茶暫蘇喉嚨煙火施粥得狀元之報感見在家吉人任勞代庖廚之勤是名行行衲子借此方便補天地之憾庶幾委曲濟堯舜之窮奈囊絕半文家徒四壁有懷杞慮空勒婆心念為善當與眾同之思美行非一人做得敬修瑣蕪延達高明仗借口角春風大沛窮途雨露莫效新貴人哭窮套子當擴大聖賢饑渴良能某幸甚眾生幸甚。

### 為保文學聖吾

近來百病攢簇惟思石頭高枕倣希夷子睡方奈何嶽色堆藍峰光擁碧禿屢生妄想不盡意欲攜囊挹取贈我故人作山中清曠人事又是籠雲第二道題目也被這廝勾引崎嶇險窄而石波雪浪當春寒料峭之時種種驚人谷口桃花如脂壑底煙氣如綿瀑聲松韻又種種羨人興雖不淺羸形瘦骨破衲風欺勉強股懷為歌行路難以遣之因思髫年弟兄有力有興且有學倘得共遊賞出不羈奇句而山之佳麗秀特批抹品題一番或者作後世佳話也頻頻入夢想已爾葛居士入山道老檀越言待畢向子平之家累想不遑暇遊也某日唯唯五十年白首心知久曠未晤人生聚散如空中雲物不知何年何時一沐顏笑如昔日者以是縷縷。

### 寄省之大師

白首弟兄離長會短前於落花前草草一晤未傾倒而輕別如電光中著眼至今尚如醉夢模糊未真弟業病百日雖未即填溝壑止餘一具瘦骨頭吊影支離頗覺寂寥如阿兄禪暇攜杖登臨分開石橋野色踏破草徑苔痕于繫風嶺看千頃雲氣浣月溪聽萬壑松聲耳目亦覺清勝況山林薄霜染淡紅亦騷人奚囊中批抹物爾如此勝妙新涼竟令病屢生獨自享受山靈亦笑人太俗矣若待體露金風弟茶殘飯剩筆尖子禿了也。

### 雜著

#### 亂談

莫嫌削骨衝寒梅將天心漏洩氤氳一年一年開開落落生葉人生大抵如斯人身千生難得千生得個人身昏迷錯過時節只因兩字業塵輪轉塵沙剝劫老僧耳目昏聩或者道聽途說則快於飛龍行則疲於跛鱉五濁惡



世塵寰三界不安火宅三界姪慾眾生圓覺佛語彌勒法華羅刹羅刹食人精氣不歇七卷重說偈言不為女人亂惑楞嚴一部為何天堂地獄此得虞姬至今烏江楊妃馬嵬狼藉春風芍藥牡丹歲寒青松翠柏曾向賀蘭籠雲卻來正覺澡雪閒將撐月珊瑚輕易擊作兩截一為門前馬椿一作園後驢櫪世所寶惜稀奇如何恁麼賤閱只有烈馬狂牛不知不識踏折參參參參參參喫水也須防噎朋友數斯疏矣顏之厚也饒舌信與不信任他盡我悲心切切拋卻遍地黃金甘去針頭削鐵濁惡造業多端五欲首先財色歡喜恩愛冤家冤家果然路窄曾見丈夫續絃又聞紅顏改節風狂水而生波雲黑天心無月明季八股文章唐晚七言詩絕說理十分逼真入套百倍重疊君臣父子之間亦有臣亂子賊朱砂為甚點紅煙煤云何作墨過去多少英雄未來無限豪傑現在寵辱榮枯人人皆曰明哲文章才子白頭武略壯士落魄陽春曲調孤高蘆花彷彿雪白萬劫千生這遭浪作郵亭過客大鵬擘海吞龍蟪蛄巢住蚊睫藕絲牽象上山獅子肩輿狐穴只顧眼前歡娛不管三途跋涉食思百味珍饈衣想綾羅緞帛金銀珠寶盈堂受用嬌妻愛妾子孫蘭桂庭除園房異常奇特方得如意稱心奈何求之不得今世福乃前生後世又報今業三世因果分明報應纖毫不忒兒孫賢愚參差千年田房八百萬事總歸無常四大一包膿血亟亟悟道明心輕省姪殺盜竊拔去眼中金釘抽卻腦後鐵楔當識赤白青黃要明東西南北與麼模糊招搖六道四生怎徹荒草古墓新墳白骨黃泉可駭蜀道崎嶇非難人情返覆叵測客氣好勝好名做假駕言任俠李斯東市下場淮陰未央宮闕賀者未已吊來歌舞化成哽噎安者當須慮危平坦陸地一跌放下急早修行莫待閻老逼迫勿種嬌苔媚蘚休採濃嵐艷靄雜貨布袋無窮骨董皮箱排列到頭兩眼皆空須教徒薪易轍遍地總是葛藤絆倒銅頭鐵額禪參白骨淡漠淚下黃金交結翻手為雲雷陳覆手作雨吳越彼此冷煖炎涼水火益深益熱人情見慣不驚鬼語聽殘弗慊鯨魚倒上竹竿漆園夜騎蝴蝶若是勘破了也致知即能物格至誠之道前知善惡禎祥妖孽有些英靈男兒埋沒紅塵紫陌妄僭驕吝凌人天道好還似刻柔媚忒煞諂諛骯髒未免激烈若為有智主人二者寂無揀擇當念花不常紅請看日中昞昞作德心逸日休作偽心勞日拙求仁強恕而行廣福處處功德罟獲陷阱之中強半智者驅塞牛山之水美矣以其郊於大國斧斤旦旦伐之牛羊食其萌蘖誰家墓橫斷碑誰家墳斜殘碣真個相見了可長嘆一聲手拍請看龍女屠兒剎那三祇忽越千古只是一時人言某某淑慝天上水火風災刀兵饑饉瘟疫照見五蘊皆空真度一切苦厄無無無無無無三世承他恩澤澤是兇頑惡人酷尚輕躁薄劣何緣際會先師又值我明改革一旦放下歸來身心萬分忻悅人皆掩鼻過之西子偶蒙不潔瑣碎逆耳忉忉非敢唐突塞責若是誑語欺人定墮泥犁拔舌禪宗不留路頭命根偷心勦絕電光不屬斷常剎那念念生滅會得教外別傳拈過千七百則勿去棘句鉤章玄要不從方冊千仞鐵壁銀山絕無攀緣扯拽黃面一法也無淨名居士默默若要過我禪關千里馬須鞭策進

步撒手懸崖拋卻手中朽索未克研發吹毛漆桶驢年方瞥八萬四千膠盆  
憑君作麼應接真個雲月是同果然溪山各別水中之月請撈鏡裏之花請  
摘。

### 十月朔十日口占續亂談示眾

選佛場處處大開休賣弄心空及第鑪鞴火時時發焰漫招搖鐵額銅頭鑪  
無躍冶之金匱乏燕石之玉其庶幾乎未可知也雖然鉗鎚之下多頑鐵良  
醫之門足病人筍畢竟成竹魚將來化龍時節因緣春桃秋菊但我空著死  
急憐爾竟不自新家無白澤囊樂青蚨事索隱而人行怪法久弊而老成魔  
有可共見之肺肝原不妨剖以相示無可欺人之心事又何必揭以自招比  
匪故君子之傷包荒非小人之福掩耳偷鈴懸羊賣狗赤土染朱衣馬尾作  
白拂梨園著將相衣冠鸚鵡歌唐宋詩句老將不談紙上之兵醫王能用方  
外之藥流水不腐天地旋而愈出戶樞不壞日月轉而愈明頑空死定默照  
枯禪紫草硃砂河伯海若淡漠則人人可置包荒則物物可親野芹奉極尊  
貴魚眼賣瞎波斯定盤上有星水面上有乳錯認者故多能擇者似少野犴  
師子楚翬鳳毛路上豎行人碑板諸方嚴皮裡春秋圖了個甚麼作這樣行  
蹤百年能幾日誰得百年過去即今朝明晨過去日十是早刀不成刁重說  
偈曰明季八股文章唐晚七言詩律認理十分逼真入套百倍深密。

### 廣東和尚泡影集序

珠藏于蚌金隱于沙會得這兩句纔肯他珠師金師這兩句那一個不會卻  
覓個不會的更不得即有一個半個未免珠舖金市上酬價值十百換來者  
似與買賣交易無異也如珠何如金何如蚌沙何我師播弄許多絡索皆入  
水入泥婆心耳曾親到波浪裏捕蚌峰頂上淘沙九死一生方纔識得珠光  
金色到恁麼田地卻依舊擲珠於海撒金於沙全無纖毫貴重矣元來盡大  
地是個珠砌金妝的世界間有珠商金賈百折千窮總不能謾他些子具眼  
人定要親見一番始得莫將魚目珍為寶黃葉拈來也是金。

### 自狀

潤光鎮人生來薄劣父母以凶頑捨太平寺竟不樂習僧法十五還家冠十  
九即然尪羸吐血之病以慾而致二十三父逝歲旱連歲大旱三十二母逝  
適崇禎十數年兵燹饑饉貧無以殮逼真泣血是年李闖僭京師明運革清  
兵逐闖出關詔天下別髮雖有淡漠之心則善根未熟信力弗篤觀望遲疑  
又八年是時廣東和尚住持海寶法席余少生信慕師座下有南方隱衲言  
蘇州退翁和尚大闡禪道便有書問往來無何廿歲子夭王氏妻喪先師移

錫牛首蒼天夫何使我至於此極也乃決意出家攜凝光入四蓮求師披薙師曰出家好事恐爾難耐歲寒余淚下師隨准余年四十有九開園種樹欲營靜室而中阻侍師入馬鞍甘露雖內地異域僅隔一牆且荒焦甚山靈亦有薄福之處水草不多見矣偶靈巖寄書至內云日用隨緣便與麼去扇偈山錄係老僧極重人事不可以孤賒較量也云云余呈先師師曰靈巖好條長拄杖四千里外打你到者裡越明年師示寂余扶龕過海寶親見斌雅和尚亦如水乳實未見個元字腳余云塔湧書空筆誰呈咄咄章隨入賀蘭層巒瀑布雪浪松濤與夫赫連元昊斷碣殘碑不識名字之花鳥晤對養痾可以終老薄福人弗克享此清致竟為正覺土木魔王所魅拮据辛苦十載焦勞遂成不治之病徒眾知其定死營塔亭成延余一矚余云我已入荒草子何歸醉鄉為住色身色身無常為住法身法身無相二俱不住夫何為哉火葬膿血之腐敗囊盛白骨之燼餘有何交涉夫何為哉汝等道一句看道得與汝生受如道不得並汝大家活埋去也眾無語寂果云請師代一轉語余云夜來阿修羅食月余姓陳先父玉軒先母朱氏生于萬曆三十九年辛亥時年七十有三余實未悟亦不知其死之何時預搔待癢笑笑家私故以傾盡少不得明眼人指責預書偈告眾潤光無德死畢竟惡隨順惡死不得穿鑿死了就燒不可停著柴火要乾衣衫要薄骨石一把塔中停著河裡一半令水族覺幻人說夢夢人覓活一任披毛一任戴角大眾會麼佛手驢腳噫噫將錯就錯此處安閒諸方快樂。

于康熙壬戌年蒲月臨終索筆書偈曰。

潤光自來自去卻不關天干地死了燒了了了一任輪迴六趣如是說者是名正說若它說者即波旬說

書罷擲筆吉祥而逝塔于正覺之後師雖受記荊靈巖不肯匡徒領眾者何蓋師生平多病色身羸瘦緣力之不充耳故未有上堂小參然無上堂小參即古人咳唾掉臂皆是西來祖意然師所著藻雪集無有一言一句不是發明向上又奚用上堂小參而為哉師全集二卷行世板存正覺照水捐鉢資編刻藻雪集一卷附入嘉興楞嚴大藏並與法寶流通以傳不朽耳。

照水謹述

---

## CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

---

## 信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

## [前往捐款](#)

---

### 劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

---

### 線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

### [線上信用卡 / PayPal 贊助](#)

---

## 支票捐款

支票抬頭請填寫「財團法人佛教電子佛典基金會」。

For donations by check, please write the check to  
"Comprehensive Buddhist Electronic Text Archive  
Foundation".

---